



QUÆSTIO MEDICA,
QUODLIBETARIIS DISPUTATIONIBUS
MANE DISCUTIENDA
IN SCHOLIS MEDICORUM.

Die Jovis 14. Novembris 1720.

M. GABRIEL ANTONIO JACQUES;
DOCTORE MEDICO, PRÆSIDE.

An humorum præstantior, Semen?

I.



I R A corporis humani compages. E
solidis partibus illud tum & humoribus
constatum autopsiâ constat. Solidorum
elementa fibræ simplices. Harum ubi
plures strictius simul compinguntur,
ossium materiem & formam præbent.
Modò fibræ laxiori texturâ sibi invicem connexæ ner-
vos, tendines, musculos, membranas; & ex his etiam

vasa non unius generis humores continentia. Sicuti verò partes solidæ temperie, conformatione dispares, ita etiam varia subeunt officia; diversisque functionibus inserviunt; unde quædam præ aliis primas tenent & ideo nobiles audiunt. Pari modo humorum forma non eadem, nec idem usus: non omnium ergo par dignitas & laus. Natura quosdam è corpore pellit inutiles tam ad individui conservationem, quam speciei propagationem: mera excrementa. At alios sedulò elaborat humores natura sibi necessarios, quos & fovet. Hos inter omnes, semen primum jure meritò vindicat locum.

II.

QUI majorem passus est elaborationem, humor ille perfectior censeretur debet. A scopo quem natura sibi proponit, ab operandi modo, à fine propter quem operatur cujusvis humoris excellentia est desumenda. Non à particularum humores constituentium tenuitate, proinde major præstantia. Perfectum hunc humorem crede qui debitam sortitus consistentiam aptus est naturæ intentionibus apprimè ut inserviat: alioquin longè tenuior quam par est factus humor discernitur, & foras amandatur excrementi formâ: exemplo sint insensibilis perspiratio, sudor, urina. A functionum ergo præstantiâ; à partium humores conficiendum nobilitate, eorundem perfectio, præcellentia. Quo magis perfectæ naturæ opus est liquor aliquis, eò cæteris antecellit humani corporis humoribus.

III.

SEMEN virile, *τὸ σπέρμα* Græcis, humor albicans, crassiusculus, viscidus, aliquantulum spumosus, ad proles generationem destinatus à natura, in testibus elaboratus, in vesiculis seu receptaculis seminalibus fovendus & ad usum conservandus. Hujus ortum ab aliarum secretionum perfectione pendere nullus

inficias ibit diligens naturæ scrutator. Non testium tantum, sed & omnium corporis partium commune opus est. Inchoari nequit nisi prius aliis omnibus elaboratis humoribus, nisi prius explicatis quæ per annos expectabant perfectionem suam testiculis: ergo naturæ perfectioris opus. Nullus humor tantâ tarditate gignitur. Verbo dicam, semen ultima naturæ secretio.

IV.

EX unâ scilicet quâcumque parte organicâ plurimæ sunt partes similes nutriendo idoneæ, quas ipsa met organa in circuitum sanguinis ex renitentiâ repellunt. Partes istæ similes quem ab organo characterem acceperunt, id est, certam quandam soliditatem, molem, consistentiamve, servant; atque præ mole quam semper retinent, cum humoribus excrementitiis tenuioribus non secedunt. At eadê aliarum partium nutritioni non inservientes ad testes amandantur hominem in his sub ovi specie aut vermis larvâ inclusum nutrituræ sunt. Semen igitur propriè sic nobis describendum venit: prima nempe embryonis nutritio ex omnibus corporis partibus præparata, juvante testium oscillo inter embryonis pulsantes villos propulsa, applicationem potiùs quàm præparationem aliquam quæsitura, tandemque omnium corporis partium communi nisu in uterum coitûs tempore tanquam homuncionis vehiculum, lac & vinculum, immissa.

V.

QUANTO vita morte præstat, tantò humor ille originem unde suam homo repetit nobilior illo quò nutritur corpus. Quotidiè succus homini nutritus, purior chylus, ut vitâ fruatur, omninò necessarius. At homini contingit & urget lethi necessitas: irrevocabile fatum! quod corrigere nefas. Ut verò quantum potuit humano generi provideret, cuique

homini quô sobolesceret modum natura concessit. Itâ non ad aliquot tantum annorum millia, sed & in æternum usque se perennat homo. Totus vitæ labor, speciei propagationis cura: hinc omnibus insitum immane generandi desiderium. Cuidam ætati denegata potestas. Hæc nempe naturæ perfectæ opus & signum, cujus actus est coitus. Hujus causa nec-non & materies semen, alimenti secundæ coctionis residuum, ex omnibus corporis humani partibus deciduum, ad prolis generationem.

Ergo humorum præstantior, Semen.

Domini Doctores disputaturi.

M. Joannes-Bapt. Silva, Serenissimi Ducis Borbo- nii Medicus ordinarius.	M. Franciscus Ponsse.	M. Jacobus-Benig. Wins- lovo, Regia Scientiarum Academia socius.
M. Joannes-Bapt. Marti- neng.	M. Thomas Bernard. Bertrand.	M. Ludovicus Guillot.
M. Joannes-Henric. Im- bert, è Regiâ Scientia- rum Academiâ.	M. Egidius Adam.	M. Joannei-Bapt. Ferme- lhuis, in Regiâ Artium Academiâ, socius hono- rarius.

Proponebat Parisiis GEORGIUS-ANTONIUS
TARONDE LOMMEAU, Bajocensis, Baccalaureus.
Medicus, A. R. S. H. 1720, à sexta ad meridiem.

Typis J. QUILLAU, Universitatis & Facultatis Medicinæ.
Typographi.